



MEDIDAS DE PROTECCIÓN PARA A PREVENCIÓN E TRATAMENTO INTEGRAL DA VIOLENCIA DE XÉNERO

RESOLUCIÓN do 5 de abril de 2016, da Secretaría Xeral da Igualdade, pola que se regulan as bases para a concesión das axudas establecidas no artigo 27 da Lei orgánica 1/2004, do 28 de decembro, de medidas de protección integral contra a violencia de xénero, e no artigo 43 da Lei 11/2007, do 27 de xullo, galega para a prevención e o tratamento integral da violencia de xénero, e se procede á súa convocatoria para o ano 2016.

http://www.xunta.es/dog/Publicados/2016/20160415/AnuncioG0244-050416-0006_gl.html

OBJECTO

A finalidade de estas axudas é proporcionar apoio económico ás mulleres que sofren violencia de xénero.

TIPOS DE AXUDAS

- Axudas dirixidas a mulleres vítimas de violencia de xénero que residan na Comunidade Autónoma de Galicia e acrediten insuficiencia de recursos e unhas especiais dificultades para obter un emprego.
- Axudas de indemnizacións dirixidas ás mulleres que sofren violencia de xénero e/ou ás e aos menores ou persoas dependentes delas polos danos e perdas ocasionados como consecuencia da situación de violencia, fixadas mediante sentenza xudicial, nos casos de incumprimento, por insolvencia, por parte do obrigado a satisfacelas.

LUGAR E PRAZO DE PRESENTACIÓN DAS SOLICITUDES

As solicitudes e documentación necesaria deberán presentarse preferiblemente por vía electrónica a través do formulario normalizado dispoñible na sede electrónica da Xunta de Galicia (<https://sede.xunta.es>).

Opcionalmente, tamén se poderán presentar en soporte papel en calquera dos lugares e rexistros autorizados para facelo.

O prazo de presentación de solicitudes rematará o 30 de novembro de 2015 no caso das medidas de protección integral contra a violencia de xénero, e o 31 de outubro de 2016 para as indemnizacións.

CONTÍA DAS AXUDAS

Axudas de medidas de protección integral contra a violencia de xénero

- O importe desta axuda será, con carácter xeral, equivalente ao de seis meses do subsidio por desemprego vixente.
- O importe desta axuda será equivalente a doce meses de subsidio por desemprego nos seguintes casos:



- Cando a vítima tivese a cargo un familiar ou menor acollido/a.
- Cando a vítima, sen responsabilidades familiares, tivese unha discapacidade igual ou superior ao 33 %.
- O importe desta axuda será equivalente a dezoito meses de subsidio por desemprego nos seguintes casos:
 - Cando a vítima tivese ao seu cargo dous ou máis familiares ou menores acollidos/as, ou un familiar e un menor acollido/a.
 - Cando a vítima tivese ao seu cargo un familiar ou menor acollido/a e unha discapacidade igual ou superior ao 33 %, ela ou a persoa dependente.
- O importe desta axuda será equivalente a vinte e catro meses de subsidio por desemprego nos seguintes casos:
 - Cando a vítima tivese ao seu cargo dous ou máis familiares ou menores acollidos/as, ou un menor acollido/a e unha discapacidade igual ou superior ao 33 %, ela ou algunha das persoas dependentes.
 - Cando a vítima con responsabilidades familiares ou o familiar ou menor acollido/a con quen conviva tivese recoñecido oficialmente un grao de discapacidade igual ou superior ao 65 %.

Axudas de indemnización

A contía da indemnización que se aboará será, sen prexuízo do disposto no seguinte parágrafo, a fixada pola resolución xudicial correspondente que quede pendente de pagamento tras a declaración de insolvencia do obrigado a esta, excluídos os xuros de mora.

A contía máxima da indemnización establécese en 6.000 €, excluídos os xuros de mora, por cada persoa beneficiaria.

REQUISITOS

Axudas de medidas de protección integral contra a violencia de xénero

Para ser beneficiaria desta axuda, a solicitante deberá reunir na data da solicitude da axuda e manter ata o momento en que se resolva a dita solicitude, os seguintes requisitos:

- Ser muller, maior de idade ou emancipada, vítima de violencia de xénero.
- Non convivir co agresor.
- Estar empadroada e ter residencia efectiva en calquera dos concellos da Comunidade Autónoma de Galicia. No caso das mulleres estranxeiras tamén será necesario ter permiso de residencia e de traballo.
- Ter especiais dificultades para obter un emprego.
- Carecer de rendas que, en cómputo mensual, superen o 75 % do SMI vixente, excluída a parte proporcional de dúas pagas extraordinarias.



Axudas de indemnización

Poderán ser beneficiarias destas indemnizacións as mulleres, maiores de idade ou emancipadas, vítimas de violencia de xénero e todas as persoas que dependan economicamente e/ou asistencialmente dunha muller que sufra violencia de xénero, nas cales concorran as seguintes circunstancias:

- Estar empadroada e ter residencia efectiva en calquera dos concellos da Comunidade Autónoma de Galicia. No caso das mulleres estranxeiras tamén será necesario ter permiso de residencia e de traballo.
- Ter dereito á percepción dunha indemnización, por danos e perdas derivados dunha situación de violencia de xénero, recoñecida nunha resolución xudicial firme ditada por un xulgado ou tribunal con sede na Comunidade Autónoma de Galicia.
- Que exista constatación xudicial do incumprimento do deber de satisfacer a indemnización por insolvencia do obrigado ao pagamento.
- Que a persoa beneficiaria se atope nunha situación de precariedade económica como consecuencia da falta de pagamento da indemnización xudicialmente recoñecida.
- Non convivir co agresor.

Unha vez presentada a solicitude da axuda prevista nesta resolución, a obriga de manter o empadramento e a residencia efectiva na Comunidade Autónoma de Galicia ata a resolución da súa solicitude poderá estar exceptuada, para ambas as axudas, no caso daquelas mulleres que, por motivos de seguridade derivados da situación de violencia de xénero, se vexan obrigadas ao traslado a outra comunidade autónoma do territorio, sempre que se xustifique con carácter previo esta circunstancia a través dun informe dos servizos de aco-llida ou dos servizos sociais da Administración pública galega autonómica ou local.

INFORME DO SERVIZO PÚBLICO DE EMPREGO

O informe do Servizo Público de Emprego deberá facer constar que a muller solicitante desta axuda, debido á súa idade, falta de preparación xeral ou especializada e ás circunstancias sociais, non vai mellorar de forma substancial a súa empregabilidade pola súa participación nos programas de emprego específicos establecidos para a súa inserción profesional.

PAGAMENTO DAS AXUDAS

A contía da axuda concedida aboaráselles ás beneficiarias nun pagamento único polo importe que lles corresponda, segundo a resolución de concesión.

O pagamento da axuda regulada nesta disposición farase unicamente na conta que as solicitantes fixesen constar na solicitude, que debe permanecer activa para estes efectos mentres non se teña constancia da finalización do expediente. A Administración non se fará responsable da imposibilidade de efectuar o ingreso por causas directamente imputables ás solicitantes.



INCOMPATIBILIDADES

- As axudas reguladas nesta resolución son incompatibles coa percepción de calquera outra axuda establecida tanto polas administracións públicas ou calquera dos seus organismos, entes ou sociedades como por calquera entidade privada destinada para o mesmo fin.
- A axuda de medidas de protección integral contra a violencia de xénero, e compatible coas axudas para a asistencia de vítimas de delitos violentos e contra a liberdade sexual.
- A axuda económica e a indemnización reguladas na orde á que nos estamos a referir son compatibles entre si.

DOG núm. 72, 15 de abril de 2016